

FUNDACION LIBERTADOR G.F. BETICO CROES

Mañan ta e fecha cu, cu hopi tristeza, Aruba ta recorda e Libertador di Aruba, Betico Croes.

31 di december aña 1985, pa exactamente 9:20 di anochi, na vispera di e aña den cual Aruba lo haya su Status Aparte, e gran luchador di nos Status Aparte Betico Croes ta hayé involucra den un accidente automobilístico serio. Tabata oranan di hopi angustia. Tristeza a reina na henter Aruba.

Nos ta pará na vispera di nacemento di e pais Aruba pero esun cu a logre pa nos mes no lo por presencié. Mei anochi ta bati, aña 1986 ta drenta, dilanti bestuurskantoor hopi hende ta celebra. Mientras cu for di hospital nos ta weita con dilanti Bestuurskantoor vuurwerk ta bai halto, nos por scucha e soyo di e multitud grandi di hende cu ta yora nan lider, kende a bira e Libertador di Aruba e momento cu e pais Aruba a nace. Despues di a permanece 11 luna den coma, Betico a fayece na Hulanda 26 di november 1986, den e aña cu Aruba a haya su Status Aparte gracias na e lucha incansable.

Ta destino a haci cu hustamente na Hulanda, nos madre patria, ela fayece? Hustamente na e pais unda ela bataya incansablemente pa e Status Aparte di Aruba; hustamente na e pais contra cual ela lucha pa finalmente e deseo di su pueblo wordo concedi?

Nos a habri 1986 como un pais soberano den Reino Hulandes.

Manera a ser anuncia anteriormente, nos a lanta e fundacion aki pa asina salvaguardia e historia di Aruba, memoria di e Libertador di Aruba, y su lucha pa cu nos Status Aparte.

Desde nacemento di e Pais Aruba ta trocemento di historia so nos a conoce. Te ainda, 10 aña despues di su accidente, ta existi esnan cu no kier acepta cu no por sigui troce historia di Aruba. Ta Betico Croes ta y lo keda e Libertador di Aruba. Ta un biaha den historia di un pais ta nace un personan cu ta bin no mundo cu un meta. Y esey tabata e destino poni pa Betico Croes. Un hoben cu despues di a termina su estu-

dionan na Hulanda, a regresa su pais natal. Desde su regreso Betico tabata un homber hopi activo riba tereno cultural y di enseñanza. Y despues di a fungi pa hopi aña como maestro di scol, ela drenta arena politica di Aruba. Y desde inicio di su carrera politica ela bin ta profila su mes como un gran sostenedor di e lucha pa nos Status Aparte. Ela lanta su propio partido y a inicia cu un lucha incansable y determinante contra Hulanda. Y finalmente despues di hopi sacrificio, na aña 1983, Betico a logra pa nos e tan anhela Status Aparte cu lo a drenta na vigor 1er di januari 1986.

Nos Status Aparte, cu ta wordo considera e logro di mas grandi den e historia di Aruba, ta un logro nacemento di Betico Croes, e Libertador di Aruba. Betico no a logra mira su ideal bira realidad. Su meta cu cual el a bin e mundo aki, a keda cabalmente cumpli. Apesar di tur contratiempo, apesar di tur presion di parti di Hulanda, Betico no a doblega na caminda. Al contrario ela yega di expresa cu si e mester bringa contra naturaleza pa logra su ideal, e lo bringé.

Un expresion di Betico ta bin na memoria: "Es mejor morir de pie que vivir de rodillas". Un dicho sumamente significativo en especial si nos mira e situacion den cual Hulanda kier hinca nos.

Hulanda, na un manera hopi subtiel, ta tratando sofisticadamente di kita poco a poco nos autonomia for di nos. Fundacion Libertador Betico Croes ta desea di recorda e pueblo di Aruba cu ta nos deber pa conhuntamente salvaguardia nos Status Aparte. Hamas nos mester acepta pa cualkier persona, instancia o pais kita nos autonomia di nos. Y si tin un Arubiano cu ta capaz di traiciona e pueblo di Aruba di tal manera, no ta digno di ta yama su mes Arubiano. E lo ta Arubiano di nacemento pero hamas di curazon. Nos no por acepta hamas pa e lucha di nos antecesoran, e lucha di nos Libertador Betico Croes, bai perdi pa capricho di cualkier

persona, instancia o pais. Autonomia di Aruba ta un derecho y no un favor cu Hulanda a haci Aruba. Y ta nos deber pa sali na vanguardia di nos derecho ora cu e ta na peligro.

Ta ironia di bida a haci cu Betico a fayece hustamente na Hulanda? Cu su expresion di "Si mi cai na caminda, gara e bandera y sigui cu e lucha", Betico tabata kiermeen pa gara e bandera di nos pais Aruba, y pa continua cu e lucha contra Hulanda, e pais cu ela bringa tanto, na cual pais ela hala su ultimo rosea. Betico sigur lo a realiza cu e lucha di preservacion y mantencion di nos Status Aparte lo ta igual di fuerte cu e lucha pa realizacion di nos Status Aparte.

Nos como pais Aruba no mester traiciona nos origen ni nos lucha. Y pesey Fundacion Libertador Betico Croes, riba e dia cu nos ta conmemorando Betico, ta haci un apelacion riba e pueblo di Aruba pa na cierre di e aña aki nos evalua e rumbo cu nos ta tumando y realiza cu e meta principal di henter e pueblo di Aruba mester ta: preservacion di nos Status Aparte. Tur esaki na honor y memoria di nos gran Libertador Betico Croes.

Pa falta di grandeza tin personanan cu te ainda tin dificultad pa reconoce Betico Croes como e Libertador di Aruba, mientras cu ta Betico ta esun cu a culmina e lucha pa logro di nos Status Aparte. Desde nacemento di nos Pais Aruba, no tin ningun gobierno cu a duna contenido real na e titulo "Libertador di Aruba". Betico ta tata di e pais Aruba; Betico ta e Libertador di nos pais Aruba. Y no cabe duda cu a yega tempo pa, de una vez por todas, e wordo reconoci y honra como tal. Esaki ta meta di nos fundacion.

Nos kier termina cu un poesia cu semper a logra menciona Betico y esaki como punto di meditacion na vispera di un aña nobo.

FLOR DI LIBERTAD - Ki bal un homber sin derecho - Ki bal un homber sin bandera - Ki bal tin curazon den pecho, si bo bo no ta liber

den bo tera - Dios laga cu dia cu mi muri, Aruba por ta su mes doño - Y su bandera, Flor di Libertad, lo dorna e lugar di mi eterno soño.

Un feliz y prospero aña 1996

pa henter e pueblo di Aruba ta e sincero deseo di Fundacion Libertador Betico Croes.

Guisette F. Croes, presidente.